

INUIT ATAQATIGIIT INATSISARTUNI



UPA2026/134

Juunip 11-at 2026

Nivi Rosing

Innuttaasut atsiornernik katersinermikkut siunnersuutinik Inatsisartuni suliarineqartussanik saqqummiussisarnissaat siunertaralugu Naalakkersuisut aaqqissuussinermik pilersitseqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Pipaluk Lynge, Inuit Ataqatigiit)

Oqaaseqaat.

Inatsisartunut ilaasortaq Pipaluk Lynge, Inuit Ataqatigiinnit siunnersuummut pingaarutilimmut qaqitsigavit qujanaq.

Siunnersuutip siunertaa tassa tamat oqartussaannermut eqaallisaaneq, innuttaasunut peqataatsineq.

Nunatsinni Tamat oqartussaaneq nukittuvoq, kisianni akuutitsineq eqaallisartuarsinnaavarput.

Ammasumik ingerlatsineq eqaallisartuarsinnaavoq, taamaammat una siunnersuut Inuit Ataqatigiinnit pingaartipparput.

Inuit Ataqatigiinnit ammasumik, peqataatsitisumik aamma tamat oqartussaananut eriaginnittuuvugut, innuttaasut peqataasutut misiginissaat siunniuttuarparput taamaammat una siunnersuut tamakkiisumik taperserparput.

Misissuininni takusinnaavara Nunat arlallit aamma taamak aaqqissugaqarnikuusut, soorlu assersuutigalugu;

Finlandimi aamma Danmarkimi innuttaasut 50.000-it atsiorsimagaangata inatsisartuisa siunnersuut qaqqinnissaannut pisussaaffinittarput.

INUIT ATAQATIGIIT INATSIARTUNI



Storbritanienimi 100.000-it atsiorsimagaangata aaliangerneqartarpoq inatsisartuisa oqallisigissaneraat.

New Zealandimi atsiortitsinerit kingunerisarpaat ataatsimiititaliaq susassaartoq eqqartornissaannut pisussaaffinittarneri.

Taasakka assersuutaannaapput ersersinniarlugu suleriaatsit assigiinngitsut Nunanit allanit atorpeqartut, takorloorneqarsinnaavoq systemiminnut tulluarsarsimagaat, taamaammat Inuit Ataqatigiinnit pingaartipparput uagut Inatsisartoqariaatitsinnut tulluarsakkamik aamma innuttaassut amerlassusaanut tulluurtumik aqqissuussisoqassasoq inassutigaarput.

Pingaartipparputtaaq atsiortitsinerimi kinaassutsimut uppernarsaammik arlaannik atortoqassasoq, soorlu mitid Nunatsinni tulluarsinnaavoq tassami aamma eqqortumik ingerlanneqartariaqartoq Inuit Ataqatigiinnit pingaartikkatsigu.

Taamak oqaaseqarluta siunnersuut akuerineqarnissaa inassutigaarput, partiit allat ataatsimiititaliami sukumiinerusumik oqallikkusuppata soorunami aamma ammaffigaarput.

Qujanaq.